



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 039555 21 Iž**  
**Sarajevo, 18.01.2021.godine**

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Srete Crnjak, predsjednik vijeća, Dinke Bešlagić-Čovrk i Vesne Trifunović, članovi vijeća, odlučujući o žalbi političkog subjekta SDP BiH – Socijaldemokratska partija BiH, ul. Alipašina 41, Sarajevo, izjavljenoj protiv odluke Centralne izborne komisije Bosne i Hercegovine broj: 05-1-07-1-1/21 od 14.01.2021. godine, u nejavnoj sjednici, održanoj dana 18.01.2021.godine, donio je

**R J E Š E N J E**

**Žalba se odbija kao neosnovana.**

**O b r a z l o ž e n j e**

Centralna izborna komisija dana 14.01.2021. godine pod brojem 05-1-07-1-1/21 izmijenila je Odluku broj 05-1-07-1/21 od 03.01.2021. godine o utvrđivanju i objavljivanju rezultata Lokalnih izbora 2020. godine u Gradu Mostaru za nivo izborno jedinice 2 (Stari Grad)-155 za političke subjekte KOALICIJA ZA MOSTAR 2020-SDA, SBB, SBIH, BPS-S.H. I PRVA MOSTARSKA PARTIJA i njihove kandidate prikazane tabelarno.

Protiv navedene odluke žalitelj je blagovremeno izjavio žalbu u kojoj navodi da je nakon ponovnog brojanja na osnovu naredbi Centralne izborne komisije BiH utvrđeno veliko odstupanje u rezultatima, kako u broju osvojenih glasova političkih subjekata, tako i u broju preferencijalnih glasova kandidata unutar liste političkog subjekta.ponovna brojanja ukazala su da je izborni proces kompromitovan, da su birački odbori masovno kršili odredbe Izbornog zakona BiH i Pravilnika o provođenju izbora u BiH, žalitelj smatra da je osporavana Odluka nezakonita jer je zasnovana na nepotpuno utvrđenom činjeničnom stanju, zbog čega predlaže da Apelaciono vijeće Suda BiH poništi istu i vrati na ponovni postupak uz nalog da Centralna izborna komisija po službenoj dužnosti u skladu sa članom 5.30 st. (5) Izbornog zakona Bosne i Hercegovine naredi ponovno brojanje svih redovnih biračkih mjesta za nivo gradske izborne jedinice i izbornih jedinica gradskih područja po političkim subjektima i kandidatima političkih subjekata, te shodno tome utvrdi rezultate Lokalnih izbora u Gradu Mostaru 2020. godine.

Centralna izborna komisija Bosne i Hercegovine u odgovoru na žalbu je predložila se ista odbije kao neosnovana.

Žalba nije osnovana.

Prema stanju spisa, u postupku koji je prethodio donošenju Odluke broj: 05-1-07-1-1/21 od 03.01.2021. godine o utvrđivanju i objavi rezultata Lokalnih izbora 2020. godine u Gradu Mostaru, zbog nemogućnosti Gradske izborne komisije Mostar da objedini utvrđene izborne rezultate jer pojedini birački odbori nisu pravilno izvršili brojanje glasačkih listića na biračkim mjestima, Centralna izborna komisija BiH je izdala ukupno 45 naredbi na osnovu kojih je Gradska izborna komisija Mostar vršila otvaranje vreća sa glasačkim materijalom i brojanje glasačkih listića u cilju pravilnog objedinjavanja utvrđenih izbornih rezultata.

Nakon što je otklonila uočene nepravilnosti, na naprijed navedeni način, u skladu sa odredbama Izbornog zakona BiH i Pravilnika o provođenja izbora u Bosni i Hercegovini ("Službeni glasnik BiH", broj: 25/20, 38/20, 63/20, 70/20 i 72/20), Centralna izborna komisija BiH je dana 03.01.2021. godine donijela Odluku o utvrđivanju i objavi rezultata Lokalnih izbora 2020. godine u Gradu Mostaru broj: 05-1-07-1-1/21 od 03.01.2021. godine.

Nadalje, nakon objave Odluke broj: 05-1-07-1-1/21 od 03.01.2021. godine o utvrđivanju i objavljivanju rezultata Lokalnih izbora 2020. godine u Gradu Mostaru i podnesenih zahtjeva za ponovno brojanje, kao i ponovnog brojanja po službenoj dužnosti u skladu sa članom 5.30 stav (5) i (6) Izbornog zakona Bosne i Hercegovine, naredbama Centralne izborne komisije BiH broj: 05-1-7-11-48-1/21 od 08.01.2021. godine, broj: 05-1-7-11-48-2/21 od 11.01.2021. godine, broj: 05-1-7-11-48-3/21 od 11.01.2021. godine i broj: 05-1-7-11-48-4/21 od 13.01.2021. godine, naredeno je u Glavnom centru za brojanje ponovno brojanje glasačkih listića za određene nivoe vlasti na pojedinim biračkim mjestima, cijeneći da ima činjenica koje opravdavaju ponovno brojanje, nakon čega su nastupile promjene u dodjeljenim mandatima i broju osvojenih glasova za političke subjekte i kandidate unutar kandidatskih listi.

Imajući u vidu promjene u dodjeljenim mandatima i broju osvojenih glasova za političke subjekte i kandidate unutar kandidatskih listi, koje su nastupile nakon ponovnog brojanja glasačkih listića Centralna izborna komisija BiH je donijela ožalbenu odluku broj: 05-01-07-1-1/21 od 14.01.2021. godine.

U konkretnom slučaju podnosilac žalbe je prethodno podnio zahtjev za poništenje glasanja putem posebnog mobilnog tima, a koji je Centralna izborna komisija BiH odbacila kao nedopušten. Na navedeni zaključak Centralne izborne komisije BiH uložena je žalba Apelacionom odjelenju Suda BiH, koja je rješenjem broj: S1 3 Iž 039469 21 Iž od 12.01.2021. godine odbijena.

Imajući u vidu promjene u dodjeljenim mandatima i broju osvojenih glasova za političke subjekte i kandidate unutar kandidatskih listi, koje su nastupile nakon ponovnog brojanja glasačkih listića Centralna izborna komisija BiH je donijela ožalbenu odluku broj: 05-01-07-1-1/21 od 14.01.2021. godine.

Iz svega naprijed navedenog proizilazi da je Centralna izborna komisija BiH naredila ponovno brojanje glasačkih listića, po blagovremenim zahtjevima za ponovno brojanje ili po službenoj dužnosti, na svim biračkim mjestima za koje je imala informaciju da su učinjene nepravilnosti koje bi mogle uticati na dodjelu mandata.

Odredbom člana 5.30 stav (4) Izbornog zakona BiH propisano je da Centralna izborna komisija BiH može razmatrati zahtjev za ponovno brojanje glasačkih listića, ako su ispunjeni sljedeći uslovi:

1. da je zahtjev podnesen u pisanoj formi i da ga je potpisao akreditirani posmatrač, grupa od 50 ili više birača koji su glasali na istom biračkom mjestu, nezavisni kandidat, predsjednik političke stranke, nosilac liste nezavisnih kandidata ili bilo koji od predsjednika političkih stranaka koje su formirale koaliciju, ili opštinska izborna komisija;
2. da su u zahtjevu tačno navedene činjenice koje opravdavaju ponovno brojanje, uključujući članove ovog zakona koji nisu poštovani ili su prekršeni;
3. da je u zahtjevu naveden približan broj glasačkih listića za koje se vjeruje da nisu ispravni;
4. da je u zahtjevu navedeno kako bi ova povreda zakona uticala na izborne rezultate
5. da je zahtjev podnesen Centralnoj izbornoj komisiji BiH u roku od tri dana od dana kada je Centralna izborna komisija BiH objavila izborne rezultate.

Citiranim zakonskim odredbama su propisani uslovi koji moraju biti ispunjeni da bi Centralna izborna komisija BiH naredila ponovno brojanje glasačkih listića, a koje uslove podnosilac žalbe, i po shvatanju suda, nije ispunio.

Naime, i po shvatanju Suda, u zahtjevu nisu navedene činjenice koje opravdavaju ponovno brojanje, uključujući i članove Izbornog zakona BiH koji nisu poštovani ili su prekršeni (član 5.30 stav 4. tačka 2), nije naveden približan broj glasačkih listića za koje se vjeruje da nisu ispravni (član 5.30 stav 4. tačka 3) i nije navedeno kako bi ova povreda uticala na izborne rezultate (član 5.30 stav 4. tačka 4) Izbornog zakona BiH. Žalbeni navodi su paušalni i proizvoljni i ne upućuju na konkretne činjenice zbog kojih bi Centralna izborna komisija naredila ponovno brojanje na osnovu navoda zahtjeva ili po službenoj dužnosti. Žalba se zasniva na pretpostavkama koje nisu učinjene vjerovatnim.

Iz navedenih razloga apelaciono vijeće nalazi da je pobijana odluka Centralne izborne komisije Bosne i Hercegovine pravilna i zakonita, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

**PREDSJEDNIK VIJEĆA  
SUDIJA**

**Sreto Crnjak**